



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 422
fax. +387 33 726 414
e – mail: info@voda.ba

Broj: **UP-1/21-3-40-022-9/26**
Datum: **04.06.2026. godine**

„Agencija za vodno područje rijeke Save“ Sarajevo rješavajući po zahtjevu pravnog lica „DPMetals BH“ d.o.o. Vareš za izdavanje vodne dozvole za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta, u postupku rada izgrađenog privremenog odlagališta flotacijske jalovine na lokalitetu površinskog kopa Veovača II, uključujući sistem za prikupljanje, transportni cjevovod i prepumpnu stanicu za vraćanje prikupljenih procjednih voda u postrojenje za preradu rude na lokalitetu Veovača I – Tisovci, na osnovu člana 109. stav (1) tačka 11. i stav (2) tačka 1. Zakona o vodama („Sl. novine Federacije BiH“, br. 70/06) i člana 200. stav (1) Zakona o upravnom postupku („Sl. novine Federacije BiH“, broj 2/98, 48/99 i 61/22), donosi

RJEŠENJE **o vodnoj dozvoli**

1. Pravnom licu „DPMetals BH“ d.o.o. Vareš daje se vodna dozvola za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada izgrađenog privremenog odlagališta flotacijske jalovine na lokalitetu površinskog kopa Veovača II, uključujući sistem za prikupljanje, transportni cjevovod i prepumpnu stanicu za vraćanje prikupljenih procjednih voda u postrojenje za preradu rude na lokalitetu Veovača I – Tisovci, na zemljištu označenom kao K.O. Pržići, k.č. 1006, 754, 749/2, 749/1, 748/2, 747/2, 746, 750, 743 i K.O. Daštansko, k.č. 2, 3, 58, 301, 302, 314, 313, 311, 310/2, 309/2, 308, 307, 306, 304/2, 62/2, 62/1.
2. Ova vodna dozvola ne oslobađa podnosioca zahtjeva obaveze pribavljanja vodne dozvole za korištenje vode i ispuštanje sanitarnih otpadnih voda, a za čije izdavanje je nadležno Ministarstvo za poljoprivredu, šumarstvo i vodoprivredu Zeničko-dobojskog kantona, u skladu sa članom 139. stav (2) Zakona o vodama.
3. Rješenje o vodnoj dozvoli je doneseno na osnovu pregleda dokumentacije kojom raspolaže podnosilac zahtjeva, izvršenog uviđaja na lokaciji izgrađenih objekata i pod sljedećim uslovima:
 - 3.1. Da korisnik predmetnog poslovnog kompleksa izgrađene objekte i prateće sadržaje održava u funkcionalnom stanju i koristi u skladu sa njihovom prirodom i namjenom, te u skladu sa uslovima iz ove vodne dozvole.
 - 3.2. Da korisnik u roku od 6 (šest) mjeseci okonča sve aktivnosti na tehničkom prijemu izgrađenih objekata i sadržaja i Agenciji dostavi dokument tj. Rješenje za upotrebu rudarskih objekata, postrojenja, uređaja i instalacija izgrađenih prema Dopunskom rudarskom projektu izgradnje privremenog odlagališta flotacijske jalovine na lokaciji Veovača II, općina Vareš, izdato od strane Federalnog ministarstva energije, rudarstva i industrije.
 - 3.3. Da korisnik u roku od 2 (dva) mjeseca na terenu okonča sve aktivnosti na izgradnji obodnih kanala oko tijela deponije (u cilju kanalisanja oborinskih nekontaktnih voda nizvodno od deponije), u skladu sa projektnom dokumentacijom na koju je izdato rješenje o vodnoj saglasnosti, broj: UP-1/21-2-40-345-10/25 od 09.01.2026. godine. Nakon okončanja ove aktivnosti korisnik će Agenciju pismenim putem obavijestiti o okončanju svih aktivnosti i dostaviti foto dokumentaciju.
 - 3.4. Da se na ulaznoj građevini zacijevljenog potoka Jaglenac montira gruba rešetka kako bi se onemogućio ulazak krupnog kamenja, granja i sl. koje bi eventualno dovelo do začepljenja cijevi. Rok za realizaciju ove aktivnosti je 30 dana. Nakon okončanja ove aktivnosti korisnik će Agenciju pismenim putem obavijestiti o okončanju ove aktivnosti i dostaviti foto dokumentaciju.
 - 3.5. Da se u roku od 30 dana sanira pristupni put do spremnika MI1, na način da se omogućiti pristup spremniku specijaliziranim vozilom, u cilju pražnjenja i odvoženja istog. Nakon okončanja ove aktivnosti korisnik će Agenciju pismenim putem obavijestiti o okončanju ove aktivnosti i dostaviti foto dokumentaciju.

3.6. Da se objekti čija je svrha odvođenje i prepumpavanje procjednih voda iz tijela privremene deponije (drenažni sistemi, multibarijere, laguna, transportni sistemi, prepumpna stanica, muljni ispusti i dr.) redovno održavaju i koriste na način koji će obezbijediti njihovu potpunu ispravnost i funkcionalnost.

3.7. Čišćenje i održavanje lagune, transportnog cjevovoda, muljnih ispusta i rezervoara B2 na Tisovcima mora se vršiti kontinuirano.

3.8. Da se na terenu kontinuirano realizuju aktivnosti na odvozu privremeno deponovanog flotacijskog materijala sa privremenog odlagališta na Tisovcima do njegovog potpunog uklanjanja.

3.9. Do okončanja realizacije svih aktivnosti na uklanjanju privremenog odlagališta flotacijske jalovine na Tisovcima neophodno je u tehničkom smislu održavati sistem odvodnje i preduzeti sve mjere kako bi se onemogućilo da se vode sa i iz tijela deponije razlijevaju po okolnom terenu.

3.10. Procjedne vode iz privremenog odlagališta flotacijske jalovine na Tisovcima neophodno je kanalisati prema laguni 1, a zatim gravitaciono odvesti u sabirni rezervoar pumpne stanice u kojem se prikupljaju i procjedne vode sa privremene deponije Veovača II, a zatim potisnim cjevovodom transportovati u skladišni rezervoar tehnološke vode na lokaciji Tisovci, rezervoar B2.

3.11. O načinu i vremenu izvođenja radova na održavanju, odnosno o pražnjenju i zbrinjavanju sadržaja taloga lagune, odmuljivanju cjevovoda i čišćenju spremnika za talog ugrađenih uz muljne ispuste, neophodno je voditi službenu evidenciju i arhivu. Obavezna je redovna kontrola nivoa zapunjenosti spremnika ugrađenih uz muljne ispuste (MI1, MI2) i spremnik uz pumpnu stanicu, u cilju blagovremenog pražnjenja istih.

3.12. Talog iz laguna, kao i sadržaj iz ugrađenih spremnika zamuljenih voda neophodno je kontinuirano čistiti i odlagati ili na tijelo privremene deponije ili vraćati u proces proizvodnje na Tisovcima.

3.13. Osigurati priručna sredstva za brzu intervenciju u slučaju nekontrolisanog istjecanja vode iz laguna i taloga iz muljnih ispusta, kako bi se spriječilo moguće onečišćenje voda i tla (odgovarajuće posude, uređaji za pretakanje, cisterne i sl.).

3.14. Svako ispuštanje vode iz laguna, taloga iz spremnika muljnih ispusta, uključujući vodu i talog iz rezervoara B2 u površinske i podzemne vode ili tlo je zabranjeno.

3.15. Korisnik je u obavezi da za vrijeme trajanja ove dozvole izradi projektnu dokumentaciju izvedenog stanja sa prijedlogom mjera ublaženja pritiska i uticaja izgrađenih sadržaja i objekata - hidro fazu, sa svim izmjenama i dopunama.

3.16. Da se privremeno deponovanje flotacijske jalovine iz postrojenja za preradu rude Vareš, uključujući i transportni cjevovod i prepumpnu stanicu na lokalitetu površinskog kopa Veovača II vrši isključivo u skladu sa odobrenim (verifikovanim) rudarskim projektom, Rješenjima izdatim od strane Federalnog ministarstva energije, rudarstva i industrije tj. u skladu sa Zakonom o rudarstvu („Službene novine Federacije BiH” broj 26/10) i drugim pratećim provedbenim propisima, tj. podzakonskim aktima koji tretiraju ovu oblast.

3.17. Da se redovno vrši skupljanje čvrstog opasnog i neopasnog otpada na lokaciji, te isti propisno skladišti do njegovog konačnog zbrinjavanja od strane ovlaštene organizacije. Isti se ne smije ni privremeno odlagati na česticu „vodno dobro”, odnosno u vodotoke i na njegove obale.

4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH”, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH”, broj 92/07, 46/09, 79/11, 88/12 i 03/16), te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.

5. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.

6. Vlasnik, odnosno korisnik objekta nema pravo na naknadu eventualnih šteta prouzrokovanih plavljenjem i iste padaju na njegov teret u skladu sa članom 149. Zakona o vodama („Službene novine Federacije BiH”, broj 70/06).

7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
8. U periodu važenja ove dozvole, pravno lice je dužno provoditi sve mjere i aktivnosti propisane istom.
9. Prije isteka važnosti ove dozvole korisnik je dužan da podnese zahtjev za izdavanje nove vodne dozvole.
10. Ova vodna dozvola, shodno članu 117. stav (1) Zakona o vodama se daje sa rokom važenja od 2 (dvije) godine od dana pravosnažnosti ovog rješenja. Ova vodna dozvola prestaje da važi u slučaju da se ne ispune uslovi iz tačke 3. ovog rješenja.
11. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice „DPMetals BH“ d.o.o. Vareš obratilo se ovoj Agenciji, aktom broj:215/2026 od 20.01.2026. godine koji je zaprimljen na protokolu Agencije dana 27.01.2026. godine, sa zahtjevom za izdavanje vodne dozvole za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada izgrađenog privremenog odlagališta flotacijske jalovine na lokalitetu površinskog kopa Veovača II, uključujući sistem za prikupljanje, transportni cjevovod i prepumpnu stanicu za vraćanje prikupljenih procjednih voda u postrojenje za preradu rude na lokalitetu Veovača I – Tisovci, na lokalitetu površinskog kopa Veovača II Vareš, K.O. Pržići, k.č. 1006, 754, 749/2, 749/1, 748/2, 747/2, 746, 750, 743 i K.O. Daštansko, k.č. 2, 3, 58, 301, 302, 314, 313, 311, 310/2, 309/2, 308, 307, 306, 304/2, 62/2, 62/1.

U provedenom postupku, uz zahtjev za izdavanje vodne dozvole dostavljena je i pregledana sljedeća dokumentacija:

A. Opća dokumentacija

- Rješenje o izmjenama podataka, broj: 043-0-Reg-25-001083 od 06.10.2025. godine izdato od strane Općinskog suda u Zenici – ovjerena kopija,
- Rješenje o vodnoj saglasnosti, broj: UP-1/21-2-40-345-10/25 od 09.01.2026. godine izdato od strane Agencije za vodno područje rijeke Save, Sarajevo – kopija,
- Konačan zapisnik o izvršenom tehničkom pregledu izvedenih radova izgradnje privremenog odlagališta flotacijske jalovine na lokaciji Veovača II, općina Vareš, broj: 2925/2025 od 18.09.2025. godine,
- Obavijest o otklanjanju primjedbi po zapisniku broj: 2925/2025 od 18.09.2025. godine o izvršenom tehničkom pregledu izvedenih radova na osnovu odobrene projektne dokumentacije – kopija,
- Izvještaj o kvalitativno-kvantitativnom prijemu i provjeri ispravnosti cjevovoda i prepumpne stanice od jalovišta do postojećih bazena za tehnološki proces, broj: 1310/26 od 03.04.2026. godine – kopija,
- Izvještaj o izvedenim radovima, broj: 391-03/26 od 30.03.2026. godine urađen od strane Celab d.o.o. Kakanj,
- Rješenje, Up/I broj: 06-14-1-518/24 od 23.10.2024. godine izdato od strane Federalnog ministarstva energije, rudarstva i industrije – ovjerena kopija,
- Rješenje, Up/I broj: 06-14-1-899/23 od 08.01.2024. godine izdato od strane Federalnog ministarstva energije, rudarstva i industrije – kopija,
- Rješenje, Up/I broj: 06-14-1-182/24 od 12.04.2024. godine izdato od strane Federalnog ministarstva energije, rudarstva i industrije – kopija,
- Izjava o usklađenosti, broj: 026/24 od 01.07.2024. godine izdata od strane Lukavac beton d.o.o. Banja Luka – kopija,
- Certifikat o fabričkoj kontroli proizvodnje, broj 32/24 od 01.07.2024. godine izdat od strane Instituta za građevinarstvo, građevinske materijale i nemetale Tuzla sa prilogom i Izvještajem broj: 112/25-III od 15.04.2025. godine -kopija,
- Certifikat o stalnosti svojstva 1/05-ZGP-1724 Izmjena i dopuna br.3 izdat od strane Instituta IGH d.d. Zagreb, RH – kopija,

- Certifikat o stalnosti svojstva 1/05-ZGP-2264 Izmjena i dopuna br.2 izdat od strane Instituta IGH d.d. Zagreb, RH – kopija,
- Uvjerjenja o kontroli, broj: 12022SAT II SER.5 EN 10204-3.1/2004 od 12.02.2025. godine, broj: 14022SATIII+15022SAT 1 SER.10 od 15.02.2025. izdata od strane Ferro Keš d.o.o. Mostar - kopije,
- Izjava o svojstvima, br. 64812316749-ZGP-001 od 15.06.2023. godine izdata od strane Ferro Keš d.o.o. Mostar - kopija,
- Izjava o svojstvima, br. 00163780307-ZGP-20/003 od 06.12.2024. godine izdata od strane Institut IGH d.d. Zagreb, RH - kopija,
- Test report of pipe testing 3.1. ACC.EN 10204 od 05.02.2025. godine izdat od strane Tehnical-tehnological laboratory of konti hidroplast North Macedonia – kopija,
- Izjava o svojstvima u skladu sa EU propisom za građevinske proizvode br. 205/201, broj: 10.11/24-04 od 14.01.2025, godine izdata od strane Bentoproduct d.o.o. Banja Luka – kopija,
- Certificate of Conformity of the Factory Production Control 1213-CPR-4686 od 1. decembra 2023. godine izdat od strane SKZ Testing GmbH Germany sa pratećom dokumentacijom – kopije,
- Dokaz o uplaćenju federalnoj upravnoj pristojbi na zahtjev.

B. Tehnička dokumentacija

- Glavni hidrotehnički projekt odlagališta flotacijske jalovine PK „Veovača II“ urađen od strane Zagrebinspekt d.o.o. Mostar, broj: 01-15-132-IX/24, rujan 2024. godine,
- Glavni projekat cjevovod i prepumpna stanica od budućeg jalovišta do postojećih bazena za tehnološki proces u sklopu rudnika Adriatic Metals, Tisovci-općina Vareš urađen od strane „Ibis“ d.o.o. Zavidovići, broj: 88-IB-G/24, IX/2024. godine,
- Dopunski rudarski projekat privremenog odlagališta flotacijske jalovine lokacija: Tisovci, općina Vareš (mašinski i elektro dio), urađen od strane Rudex d.o.o. Sarajevo, broj 09/24, mart 2024. godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 12. stav 5. i 6. Pravilnika o sadržaju, obliku, uvjetima i načinu izdavanja i čuvanja vodnih akata („Službene novine Federacije BiH“ broj: 31/15, 55/19, 41/20 i 63/22), izvršen je obilazak terena u postupku izdavanja vodne dozvole za Investitora „DPMetals BH“ d.o.o. Vareš privremenog odlagališta flotacijske jalovine uključujući i transportni cjevovod i prepumpnu stanicu na lokalitetu površinskog kopa Veovača II Vareš i tom prilikom sačinjen Zapisnik o izvršenom uvidaju broj:UP-1/21-3-40-022-7/26 od 02.06.2026. godine.

Na osnovu dostavljene dokumentacije, izvršenog uviđaja na licu mjesta, utvrđeno je sljedeće:

- Odlagalište flotacijske jalovine se planira izraditi u dvije faze. Faza I predstavlja odlagalište privremenog karaktera do trenutka kada Investitor ne odluči započeti eksploataciju PK Veovača II. Faza I se nalazi u granicama istražno- eksploatacijskog područja i predmet je ovog zahtjeva za izdavanje rješenja o vodnoj dozvoli. Površina prostora za I fazu odlagališta jalovine iznosi 57.774 m². Faza II se planira nastaviti na projektno rješenje faze I ukoliko se stvore tehničko-pravni uvjeti za njegovo projektiranje i nije predmet ovog zahtjeva.
- Prema zvanično dostavljenim podacima lokalitet deponije flotacijske jalovine se ne nalazi unutar vodozaštitnih zona vodozahvata Mala rijeka.
- Odabrana lokacija privremenog odlagališta nalazi se u blizini postrojenja za preradu rude na Tisovcima, na udaljenosti od cca 2 km. Odlagalište je s postrojenjem za preradu povezano pristupnim makadamskim putem koji se dijelom koristiti i kao trasa cjevovoda za povrat kontaktne (procjedne) vode sa odlagališta u tehnološki proces na Tisovcima. Na odlagalište će se privremeno odlagati jedna vrsta materijala – jalovina iz procesa flotacijske prerade rude. Priprema jalovine vrši se u sklopu tehnološkog procesa na lokaciji Tisovci u sklopu postrojenja za preradu rude.
- Osnovne funkcionalne cjeline su: brana u dnu deponije, dno deponije i bokovi sa ugrađenom vodonepropusnom barijerom (multi barijera - folija, getekstil, geomembrana), laguna za prikupljanje procjedne vode (betonska podloga), obodni kanali za prikupljanje oborinske (čiste) vode, zacjevljeni potok Jaglenac s ciljem zaštite kvaliteta voda, transportni cjevovod i prepumpna stanica.

- Odlagalište je projektirano na 3 etaže iznad etaže brane. Visina etaža je cca 10 m, a nagib kosine je do 1:2.5. Širina etažne ravni brane je cca 10 m, a svake sljedeće etaže cca 5 m. Raspoloživi prostor deponije će se zapuniti u periodu od 3-4 godine.
- Jalovina će se transportirati kamionom namjenjenim za prevoz ovakvih materijala (sa fiksnom ceradom) do područja odlagališta. Konzistencija materijala je čvrsta sa cca 10-20% vlažnosti.
- Procjedna (kontaktna) voda sa prostora odlagališta se prikuplja drenažnim sistemom izvedenim unutar odlagališta i usmjerava u betonsku lagunu u podnožju privremenog odlagališta, odakle će se sistemom recirkulacije jednim dijelom vraćati u tijelo odlagališta, po potrebi, a u cilju obaranja prašine, a višak vode se cjevovodom odvodi u prihvatni bazen tehnološke vode pogona za preradu rude Tisovci i koristit će se u sistemu recirkulacije pogona za preradu rude.
- Izbistrena voda iz lagune, transportnim cjevovodom se gravitaciono odvodi u sabirni rezervoar pumpne stanice u kojem se prikupljaju procjedne vode sa privremene deponije Tisovci i privremene deponije Veovača II, a zatim potisnim cjevovodom se transportuje u skladišni rezervoar tehnološke vode na lokaciji Tisovci. Trasa cjevovoda je izgrađena paralelno uz pristupnu cestu od privremenog odlagališta do pogona i ista je izvan javne saobraćajnice i naselja. Na trasi transportnog cjevovoda izgrađena su dva muljna ispusta MI1 i MI2 (čvor 7 i 37) za kontrolisano odmuljivanje cjevovoda tokom eksploatacije. Obzirom da se cjevovodom transportuje voda sa jalovišta, uz muljne ispuste na trasi cjevovoda su instalirani odgovarajući spremnici zapremine 6m³ (MI1), 30 m³ (MI2) i 30 m³ kod pumpne stanice, za privremeno zadržavanje mulja tokom procesa ispiranja cjevovoda u cilju njegovog daljeg zbrinjavanja. Na dan obilaska terena konstatovano je da pristupni put do spremnika MI1 nije adekvatan za pristup specijaliziranim vozilom, u cilju njegovog pražnjenja.
- Čišćenje i pražnjenje spremnika će se vršiti kontinuirano i sadržaj će se prazniti i vraćati na privremeno flotacijsko jalovište ili rezervoar tehnološke vode na lokaciji Tisovci. Obzirom da je laguna 2 (betonska) u sklopu privremenog odlagališta jalovine na lokalitetu površinskog kopa Veovača II niža u odnosu na postojeći sabirni tehnološki bazen - lagunu 1 na lokaciji Tisovci, izgrađena je nova pumpna stanica u koju su ugrađene dvije horizontalne KSB pumpe (Multitec A 65/11B), sa upravljačkim ormarom. Zapreminski protok pumpe je $Q=9.72$ l/s za visinu dizanja $H_p=156.56$ m. Jedna pumpa je rezervna, a jedna glavna, sistem je pogonjen električnom energijom iz postrojenja prerade kao i rezervnim napajanjem. Pumpe se pokreću soft start pogonom. Pumpna stanica će prepumpati vodu u sabirni tehnološki procesni bazen (B-2) unutar postrojenja za preradu rude na Tisovcima - sistem recirkulacije vode.
- Trenutno je izvedeno jedno privremeno odlagalište sa betonskom lagunom cca 200 m sjeverno od lokacije Tisovci koje se kontinuirano uklanja i odvozi na privremeno novoizgrađeno odlagalište. Prikupljena voda se gravitacionim cjevovodom odvodi u sabirni bazen pumpne stanice u koji su gravitaciono dovedene i vode iz lagune 2 te se ove vode sistemom recirkulacije vraćaju u tehnološki proces na postrojenje Tisovci. Prema zahtjevu za izmjenu vodne dozvole postrojenja za preradu rude Tisovci, upućenog od strane Federalnog vodnog inspektora, odlučeno je da će se ovim vodnim aktom obuhvatiti i privremeno odlagalište na lokaciji Tisovci (koje je u fazi uklanjanja) i neće biti potrebna izmjena važećeg rješenja o vodnoj dozvoli za postrojenje Tisovci.
- Projektom je predviđeno da se čiste oborinske vode (površinska voda sa okolnog područja i padina), izvan prostora odlagališta, prikupljaju u obodne kanale oko tijela odlagališta i kanališu nizvodno od tijela deponije. Na dan obilaska predmetnog lokaliteta utvrđeno je da obodni kanali oko tijela deponije nisu izvedeni.
- U krugu deponije nije planirana izgradnja niti su izgrađeni drugi objekti. Neće biti deponovanja nafte i naftnih derivata, ulja i maziva, eksplozivnih materijala i sl.
- Lokalitet privremene deponije flotacijske jalovine se nalazi u dolini potoka Jaglenac (desna pritoka Male rijeke), i izvršeno je njegovo zacjevljenje od uzvodnog početka deponije do nizvodno od lagune kontaktne vode. Na ulazu potoka u zacjevljenje izgrađena je ulazna građevina bez rešetke, zbog čega postoji mogućnost ulaska krupnog kamenja i eventualnog začepljenja cijevi. Zacjevljenje potoka prolazi ispod dna lagune kontaktne vode deponije do ispusta u prirodno korito potoka, neposredno nizvodno od lagune.

➤ Realizacija projektovanih aktivnosti na terenu nije izvršena u cjelosti u skladu sa projektnom dokumentacijom na koju je izdato rješenje o vodnoj saglasnosti od strane AVP Sava, broj:UP-1/21-2-40-345-10/25 od 09.01.2026. godine.

Na osnovu dostavljene dokumentacije i utvrđenog činjeničnog stanja, a u svrhu smanjenja negativnih uticaja predmetnog objekta i aktivnosti na stanje voda i vodni režim, podnosiocu zahtjeva su ovom vodnom dozvolom propisani uslovi u skladu sa odredbama člana 116. Zakona o vodama i članova 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva „DPMetals BH“ d.o.o. Vareš, ispunio minimum uslova za izdavanje rješenja o vodnoj dozvoli za aktivnost prikupljanja, transporta i ponovnog vraćanja prikupljenih voda u sistemu recirkulacije sa prostora privremenog odlagališta flotacijske jalovine iz postrojenja za preradu rude Vareš, uključujući i transportni cjevovod i prepumpnu stanicu na lokalitetu površinskog kopa Veovača II Vareš, te je riješeno kao u dispozitivu ovog Rješenja.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi („Službene novine Federacije BiH“, broj 06/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Voditelj postupka:

mr Selma Merdan, dipl.inž.geol.

Prilog: Tehnička dokumentacija navedena pod B. obrazloženja rješenja

Po ovlaštenju
Rukovodilac Sektora za izdavanje vodnih akata

Nihad Pezo, dipl.inž.građ.

Dostaviti:

- „DPMetals BH“ d.o.o. Vareš
- Tisovci bb, 71330 Vareš, (sa prilogom),
- AVP Sava, ISV-vodna knjiga,
- Org.jed. 40 – arhiva,
- Org.jed. 50 – ovdje,
- Oglasna ploča AVP Sava